

## II.

# HÓFADYNUR Í DÖLUM

Ýmsar heimildir, prentaðar og munnlegar greina frá hestamönnum og gæðingum þeirra löngu fyrir stofnun Glaðs.

Fyrir löngu síðan var farið að sækjast eftir hrossum af Dalaættum, sérstaklega úr Suðurdöllum, enda löngum verið talið að þar hafi verið hestakyn gott. – Kostaríkir hagar láglendisins þar, ásamt löngum og góðum skeiðvöllum meðfram ám og við ströndina (t.d. Vestliðaeyri og víðar) hafa alið upp gæðinga, kynslóð eftir kynslóð. Náttúrlegar aðstæður voru þar góðar og eru enn í dag. – Stöðug notkun í löngum ferðum efldi þrek hesta meira og betur en verið hefur hin síðari ár. Í höndum bestu hestamannanna, þar sem saman fór hæfileg áreynsla, ásamt góðri hjúkrun, sköpuðust einstakir gæðingar áður fyrr.

### „ALLRA HESTA BESTUR“

Daði Guðmundsson (d. 1563) bóndi og sýslumaður í Snóksdal var einn af kunnstu Íslendingum 16. aldar. Öllum eru kunn skipti hans við þá Hólafeðga og þá einkum handtaka þeirra á Sauðafelli haustið 1550.

Samtímaheimildir telja að Daði í Snóksdal hafi átt afburðahest, brúnan að lit. Var hann stundum nefndur MarkúsarBrúnn, án skýringa þó. Pessi brúni hestur er í sögum nefndur

með ýmsum hætti, s.s „gæðingur orðlagður“, „lífhestur Daða“ eða „allra hesta bestur“. Allar þessar nafngiftir eru raunar með eindæmum, verður þó ekki talið að heimildir séu af lakara taginu, þ.e. Biskupasögur, Sýslumannaævir og víðar er að finna eitthvað um þennan hest. Fullvist má telja að ekki hafi farið meira orð af neinum hesti í Breiðafjarðardöllum að fornu og nýju. Tvær frásagnir segja einkum frá afrekum þessa hests. Í fyrri frásögninni segir frá því þegar fylgjendur þeirra Hólafeðga hugðust fanga Daða, er hann einn síns liðs kom utan frá Rifi og ætlaði eins og leið lá heim í Snóksdal. Norðannmenn höfðu búist um við svokallað „Fyrirsát“ en svo heitir enn klettaklif á gamla Skógarstrandarveginum innanverðum. Þar höfðu þeir strengt kaðla eða reipi yfir reiðgötuna, sem lá í þrengslum milli kletta. Er skemmt af að segja, að sá brúni sleit kaðlana á ofsaferð en Daði hafði með korða sínum skorið efsta strenginn. Munu fyrirsátsmenn hafa talið Daða sér vísan, þar sem hann hafði riðið einhesta utan frá Rifi en þeir með hvílda hesta. Segir sagan að þeir hafi reynt eftirför en ekki haft erindi sem erfiði. Daði komst heim í Snóksdal og hóf að safna liði og gera virki um bæinn.

Seinni hluti sögunnar um Brún er á þá leið, að þá er skammt var liðið frá heimkomu Daða frá Rifi sendi hann ungan svein sinn, er Jón hét og nefndur Refur, til að njósna um Hólafeðga, en þeir sátu á Staðastað og höfðu uppi fyrir-ætlun um að taka Daða í heimleiðinni. Fékk Daði sveini sínum þann brúna, því nú þurfti mikils við. Tókst Jóni ferðin sem best mátti verða, að öðru leyti en því, að litlu mátti muna, þegar Jón á flóttanum frá Staðastað reið ós Staðarár á bullandi sund og lét Brún rífa sig upp af sundinu upp á snarbrattan bakka. Skildi þar með honum og norðannmönnum, þar sem þeim leist ekki áin árennileg en Jón á mikilli ferð stefndi til kunnugrар leiðar vestur yfir fjöllin. – Hafði þá „lífhestur Daða“ með stuttu millibili borgið lífi hans og átt sinn hlut í miklum þáttaskilum íslenskrar sögu. (Tímaritið Satt, 18. árg. 1970, Sig. Ólason).

## HESTUR FRANSKA PRINSINS

Sumarið 1858 kom hingað til lands Napóleon Frakkaprins á franska gufuskipinu Reine Hortenze. Tekið var með viðhöfn á móti prinsinum og farið með hann m.a. austur til Geysis. Þurfti á annað hundrað hesta í þá ferð. Fyrir prinsinn var þá valinn besti hesturinn á Suðurlandi, svonefndur Lambastaða-Stjarni. Stjarni var reiðhestur húsfreyjunnar á Lambastöðum í Garði, Sigríðar Þorvaldsdóttur, konu Ásgeirs Finnbogasonar frá Lundum í Borgarfirði. Þegar Kristín dóttir þeirra fluttist með manni sínum Lárusi Blöndal sýslumannи vestur í Dali árið 1867, varð Stjarni reiðhestur hennar þau 10 ár, er þau dvöldu á Staðarfelli og í Innri-Fagradal. – Bein Stjarna eru því geymd í Dalamold. Engin lýsing er til, er lýsi kostum þessa hests en gera má ráð fyrir að þeir hafi verið miklir og fjölbreyttir, enda mun hinn tigni gestur hafa boðið fyrir hann offjár, en hesturinn var ekki falur með neinum hætti.

Eyjólfur bóndi í Sveinatungu í Norðurárdal kvað svo um Stjarna:

Fróns um traðir tygjaðan  
tíðan vaða lætur,  
listahraðan, léttfættan,  
Lambastaðahúsfreyjan.

## FOLALDAHÓPUR ÁSMUNDAR PRESTS

Árið 1815 vígðist nýr aðstoðarprestur til Saurbæjarþinga í Döllum. Hann hét Ásmundur Gunnlaugsson (f. 1789, d. 1860), skagfirskrar ættar. Hann sat á Staðarholi í 4 ár, en þá lét sr. Eggert Jónsson á Ballará bera hann út. Höfðu málafærli gengið milli þeirra um hríð.

Í Isl. æviskrám (P.E.O.) er sr. Ásmundi lýst á þessa leið: „„Pótti áleitinn og brögðóttur, hins vegar var hann talinn fjölgáfaður til munns og handa, skrifari góður, hestamaður, vel hagmæltur og orðheppinn.““

Munnmæli segja frá viðskiptum sr. Ásmundar við sveitunga sína í Saurbænum og sr. Eggert á Ballará, t.d. eitt sinn hafði hann sundriðið langleiðina yfir Gilsfjörð, en taldi sig þá hafa verið hætt kominn. Það þykir fullvist að hann hafi verið mikill hestamaður og átt afburðahesta.

Telja verður með eindæmum það tiltæki sr. Ásmundar þegar hann flutti úr Döldum, að mælt er að hann hafi farið með 15, en sumir segja 18 folöld. Hefur trúlega ekki í annan tíma farið í einu meira úrvall hrossaefna úr sýslunni, því gera má ráð fyrir að vel hafi verið valinn ættstofninn að fololdum þessum. – Ekkert er nú vitað hvert fololdin fóru að lokum, eru þó taldar mestar líkur á því að þau hafi flest lent í Skagafirði og víðar norðanlands, enda dvaldi sr. Ásmundur þar allan seinnihluta ævinnar.

### „HNAKKBERINN MINN, SEM AÐ UNNI ÉG MEST.“

Jón Ásg. Pingeyrum

Hjálmtýr Magnússon (f. 1830, d. 1884) bóndi á Svínholi í Miðdöldum seldi á sínum tíma einn allra mesta gæðing, sem seldur hefur verið úr Döldum. Það varð fyrsti gæðingurinn, sem hestamaðurinn landskunni, Jón Ásgeirsson á Pingeyrum eignaðist. Það skeði árið 1853. Þá átti Jón heima á Kollafjarðarnesi hjá foreldrum sínum. Veturinn áður hafði Jón verið á Kvennabrekku. Sr. Guðmundur Einarsson, er þá sat Kvennabrekku, hafði Jón í skóla og til fermingarundirbúnings. Hjálmtýr bóndi á Svínholi kom oft að Kvennabrekku þennan vetur og jafnan vel ríðandi, enda kunnur hestamaður á sinni tíð. Oft kom hann ríðandi á brúnum, 6 vетra gömlum fola.

Sonur Jóns á Pingeyrum, Ásgeir í Gottorp segir svo frá: „Föður mínum var starsýnt á folann, sem var fríður sýnum, grannvaxinn og hlaupalegur og ekki vakti það síður athygli hans hversu léttilega og af miklu fjöri og fimleik þessi grannvaxni hestur bar svo þungan mann.“

Jón Ásgeirsson varð yfir sig hrifinn af þessum hesti og átti þá ósk heitasta að eignast hann. Guðlaug móðir hans varð þess áskynja hvern hug sonur hennar bar til þessa gæðings-efnis og bjargaði málum. Bréf frá henni barst suður að Svínhóli fyrir vorið. Segir svo frá að á lestum hafi svo Hjálmtýr komið norður með folann og gengu svo kaupin fram með hjálp Guðlaugar. – Jón gat ekki beðið föður sinn um penninga fyrir hesti, en til kaupa á nýjum bát hefði stórbondinn Ásgeir Einarsson lánað syni sínum fjármuni af fúsum vilja.

Pegar Jón hafði átt Blakk – en svo hét hesturinn, í 4 ár, bar svo til að Ásgeir faðir hans þurfti að fara vestur í Stykkishólm. Falaði hann Blakk til ferðarinnar, en þótt Jóni væri slíkt þvert um geð varð það úr að hann fékk hestinn lánaðan. Ekkert segir frá ferð Kollafjarðarnessbóna annað en það, að heim kom hann eftir ótrúlegan stuttan tíma – og, á Blakk einum. Önnur hross, sem voru með í för höfðu hellst úr lestinni. Pessi ferð hafði gengið svo nærrí Blakk að Jón sá sér þann kost vænstan að fella hann eftir nokkra daga. – Pannig lauk fegursta og fyrsta ævintýri Jón Ásgeirssonar í ríki hestsins.

Um afdrif Blakks farast Ásgeiri í Gottorp orð á þessa leið:

„Faðir minn syrgði Blakk mjög og á seinni árum hans var það svo, að hann vildi sem minnst um hann tala og hörmuleg afdrif hans. Það var á mjög löngum tíma, sem mér tókst að fiska upp hjá föður mínum það, sem hér að framan er skráð. *Frá Blakk hlaut faðir minn þau fyrstu áhrif og kenndir, sem að nokkru glæddu og þróuðu reiðmannshæfileika hans og hann varð síðar landskunnur fyrir.* Leturbr. E.K. (Ásgeir Jónsson, Gottorp. Horfnir góðhestar).

Sjaldan eða aldrei hefur gæðingsefni úr Döllum farið í meiri snillingshendur en Blakkur frá Svínholi. En hinu má þó ekki gleyma að undirstöðurnar í tamningu Blakks lagði bondinn á Svínholi – Hjálmtýr Magnússon.

## ÁLFATRAÐA-BLEIKUR

Taumar leika mér í mund  
minn þegar Bleikur rennur.  
þetta veika léttir lund  
lifs meðan kveikur brennur.

Pessa vísu kvað sr. Jakob Guðmundsson, er var prestur á Kvennabrekku og Sauðafelli árin 1869 – 1890. Vísan varð landskunn og eignuð ýmsum. Sr. Jakob gerði hana um bleikan gæðing, sem hann fékk frá Gunnlaugi Guðmundssyni (f. 1838, d. 1918) bónda í Álfatröðum.

Sr. Jakob á Sauðafelli var hestamaður, hagyðingur góður og stundaði lækningar eins og fleiri prestar á þeirri tíð. Hann fékkst nokkuð við uppfræðslu barna og unglings og hafði mikil menningarleg áhrif í heraði, gaf t.d. út blaðið „Bónða“ um skeið. Þar ritar hann í 5. blað, 19. apríl 1851 merkilega grein, er ber yfirskriftina „*Fáeinrar athugasemdir um stóðhrossaval, uppeldi og meðferð á hrossum.*“ Grein þessi mun trúlega vera með því elsta, semritað hefur verið um þessi efni, því í ritinu „*Lítill varningsbók*“ frá 1861 þá vitnar höfundurinn, sem var Jón Sigurðsson aðeins í tvær heimildir þar sem hann skrifar um hross, meðferð þeirra og nytsemi. Er önnur heimild Jóns blaðið Bóndinn en hin er grein eftir Ólaf Stephensen í riti Lærðómslistafélagsins frá 1788.

## HARRASTAÐA-SKJÓNI

Á Harrastöðum í Miðdolum bjó fyrir og eftir síðustu alda-mót bóndinn Hildipór Hjálmtýsson, sonur Hjálmtýs á Svínholi, er getur um í kaflanum að framan. Segja má að ekki hafi eplið fallið ýkjalangt frá eikinni þar, því Hildipór var víða kenndur fyrir hestamennsku. Bar þó einn hestur hans af öllum, einkum fyrir afburða vitsmuni.

Jón Sumarliðason hefur í óprentuðum æviminningum lýst Hildipóri á Harrastöðum og einum hesti hans, Harrastaða-Skjóna.

„Í vitund minni vaka enn margar ljúfar minningar frá þessum löngu liðnu tímum, tengdar hestunum, sem ég kynntist og eigendum þeirra.

Skjóni, rauðskjóttur vekringur með ljúfan vilja. Hestur þessi var talinn óvenju vitur og kom það oft fram í samskiptum hans við húsbondann, Hildipór Hjálmtýsson, bónða á Harrastöðum. Hildipór var, jafnhliða búskapnum, símskjóri og póstafræðslumaður. Hann var góður smiður á tré og járn, vinsæll og greiðasamur, en mjög ölkær. Margar sögur eru til af honum og Skjóna, þótt fáar verði hér skráðar.

Einu sinni sem oftar var Hildipór á ferð, ölvaður og svefnþurfi. Valt hann af baki, sem ekki var þó venjulegt, því Skjóni var vanur að hlaupa undir eftir því hvernig Hildipór hallaðist.

Óhapp þetta henti á alfaraleið og kom innan skamms maður þar að. Stóð þá Skjóni grafkyrr en eigandinn sofandi undir kviði hans. Var helst að sjá sem hesturinn hefði tekið þarna varðstöðu og væri þess albúinn að verja vin sinn fyrir hvers konar umferð og óþarfa afskiptasemi. – Óþarfi er að efast um sannindi þessarar sögu, því að maðurinn, sem hitti þá Hildipór og Skjóna var grandvar í öllum málflutningi og laus við ýkjur.

Margar sögur sagði Hildipór sjálfur af samskiptum þeirra Skjóna, meðal annars að hesturinn, sem var stór og þrekinn, hefði margoft lagst á hnén til að auðvelda reikulum vini sínum að komast á bak.

Hildipór reykti mikið bípu, jafnt á hestbaki sem endranær og vildi eldurinn oft kulna í henni þegar hann var á ferðalagi og spjallaði við ferðamennina, sem með honum voru.

Eitt sinn sem oftar vorum við saman á ferð í stríðum stormi. Skjóni var þá orðinn gamall en vel ferðafær. Pegar Hildipór bjóst til að kveikja í bípu sinni hafði ég orð á því, að það væri ekki haegt í því líku stórvíðri. „Ojú,“ svaraði

hann, „það get ég, Guð á ekki það rok til í eigu sinni, að ég geti ekki kveikt í pípunni.“ Sú varð líka raunin á. Hann kveikti í pípunni og eyddi ekki nema einni eldspýtu, en hann naut líka aðstoðar Skjóna. Hildiþór gaf slakan tauminn, færðist í kufung, dró jakkann og kápuhornið upp, fór með hendina þar innundir og kveikti í pípunni þar sem hann hélt henni í lófa sér. Um leið og Skjóni varð þessara tilburða var, hægði hann ferðina og virtist fylgjast með hverri hreyfingu mannsins, sem á baki hans sat og haga háttum sínum þar eftir. Segi menn svo að skepnurnar séu skynlausar. En sjálf sagt eru þær misvitrar eins og mennirnir. Og ég hygg að það sé eins um hestinn og mannskepnuna. að aðbúð og uppeldi hafi áhrif á skapgerð hans og ráði miklu um þau viðbrögð, sem hann sýnir í þjónustu mannsins.

Skjóni naut góðrar aðhlynningar. Hann var vel hirtur og honum gefið gott fóður. Hvert haust var hann snemma tekinn á hús og aldrei láttinn deila kjörum með gaddhestum. Hann var líka mikið notaður, því oft þurfti eigandinn að bregða sér milli bæja.

Hildiþór var meðalmaður á hæð, grannur og líkamaléttur, varð því Skjóna aldrei um megn að fara með hann hverja þá ferð, sem hann var til kvaddur. – Mér hefur orðið svona tíðrætt um Hildiþór og Skjóna vegna þess, að um þá mynduðust sögur, sem ótvíráett sýna hið nána samband þeirra og sérkennilega vitsmuni hestsins. “ Og lýkur hér frásögn Jóns.

Ég hefi það eftir öldruðum Miðdælingum að alltaf hafi sami engjabletturinn verið heyjaður fyrir Skjóna, sumar eftir sumar. Var bletturinn niður við Miðá og jafnan nefndur Skjónablettur.

## HESTAR OG HESTAMENN Í SUÐURDÖLUM.

Jón Sumarliðason, hreppstjóri á Breiðabólstað, annar aðalstofnandi Glaðs hefur m.a. skrifað eftirfarandi um hesta og hestamenn í Suðurdölum:

„*Korgur* Jóns Einarssonar í Neðri-Hundadal, var ungar steingrár að lit, en varð hvítur með aldrinum. Hann var vart meira en 50 þuml. á hæð, mikill fjörhestur með svo mjúkt brokk, að fágætt var kallað. Hann var eldsnöggur á spretti.

*Hörður* Jóns Klemenssonar í Neðri-Hundadal var rauður að lit. Hann bar sig hátt og hafði nægan vilja, mjög hastur á brokki en með hýruspor, ef hægt var farið.

*Jarpskjóni* ofsaþjörhestur með þýðu brokki. Eigandi hans var móðurbróður minn, Klemens Baldvinsson í Fremri-Hundadal. Ég þorði ekki að koma á bak þessum hesti sökum þess hve hann var fjörmikill og stífur.

*Gráblesi* móðurbróður míns Baldvins Baldvinssonar á Hamraendum var gammvakur skeiðhestur með ljúfan vilja. Hann varð hvítur með árunum.

*Smyrill*, oftast kallaður Skógs-Rauður var asaviljugur skeiðhestur og svo ferðmikill að til hans var vitnað, ekki einungis í heimahéraði, heldur víða þar sem til hans spurðist. – Ólafur Jóhannesson, bóndi í Stóra-Skógi hefur vafalaust verið góður tamningamaður, dregur það á engan hátt úr eðliskostum hestsins, þó eigandi hans hafi verið þess umkominn að veita honum gott uppeldi.

*Bleikur* var ættaður frá Lækjarskógi í Laxárdal. Hann var bráðsnjall vekringur, stór og þreklegur með glaðan vilja. Eigandi Bleiks var Ólafur Finnsson hreppstjóri á Fellsenda í Miðdölum.

*Lýsingur*, leirljós. Eigandi hans var einnig Ólafur á Fellsenda. Lýsingur, eins og Bleikur var ættaður frá Lækjarskógi. Hann var viljagóður vekringur, þrekinn og mjög fallega byggður.

Hann var ekki vanaður en notaður sem kynbótahestur í sínu heimahéraði nokkur ár. Síðar var hann seldur Höskului

Eyjólfssyni á Hofsstöðum í Hálsasveit, landskunnum hestamanni. Mun hestakyn það, sem Höskuldur á nú, eiga ætt að reka til Lýsinga, og svo mun einnig um fleiri gæðinga í Borgarfirði. – Marga fleiri góðhesta átti Ólafur á Fellsenda, er ég vel man, bæði barn og fullorðinn maður því við vorum langtínum samtíðar- og samstarfsmenn í sveitar- og sýslumálum. Ólafur var hestaunnandi mikill. Hann var laginn reiðmaður og tamdi hesta sína mest sjálfur. Góðhesta notaði hann sér til hvíldar og hressingar fram á elli-ár.

Auðvitað komu margir fleiri með gæðinga sína að Breiðabólstað á uppvaxtarárum mínum en þeir, sem hér hafa verið taldir, því að svo mátti heita að hver búandi maður ætti reiðhest. Þá var ekkert annað farartæki til ferðalaga en hesturinn. Væri hann ekki tiltækur urðu afdalamenn að fara ferða sinna fótgangandi. Allir þeir bændur, sem ég til þekkti fóru vel með reiðhestana sína, létu sér annt um þá og bundu við þá vináttu.“ Hér lýkur hinni nærfærnislegu lýsingu Jóns hreppsþjóra á nokkrum gæðingum sveitunga hans frá unglings og uppvaxtarárum á Breiðabólstað. Hafa þeir orðið honum margir hverjir ærið minnisstædir eins og frásögn hans ber með sér. – Hann skrifar mikið um hross Elísabetar móður sinnar, sem um skeið bjó ekkja á Breiðabólstað og einnig þar á eftir um sína eigin hesta, en Jón átti marga trausta góðhesta. Hér er ekki rúm til að birta það allt en í lok frásagnar um hrossin á Breiðabólstað segir Jón:

„Eins og ég fyrr gat um, sóttist ég eftir hvítum hestum og hafði stundum hestakaup, gæti ég fengið hvítan hest fyrir dökkan. Átti ég um margra ára skeið 12 – 14 hesta hvíta.

Ég minnist þess að einu sinni var ég á heimleið með heylest – 12 hesta undir böggum. Mætti ég þá Jóni Ólafssyni alþingismanni og bankastjóra, vék hann út af götunni meðan lestin fór framhjá.

Hann kom svo gangandi til míni, heilsaði mér og sagði: „Ég hélt mig vera að dreyma þegar ég sá þessa sýn. Ellefu hvíta hesta undir böggum og two til meðreiðar, og svo þetta

ilmandi fjallgresi, vel bundið og upp á búið.“ – Ég sagði honum að ég legði áherslu á að allir mínir hestar væru hvítir. „Pú ert þó með einn rauðan?“ Já, en það er nú sérstakt með þann hest, þótt rauður sé. Kostir hans, umfram það, sem almennt gerist, eru svo margir og ég tími ekki að farga honum. T.d. er hann mjög greiðstígur og fer alltaf fremstur í rekstri, en það er mikils virði, ef maður er með áburðarlest í misjöfnu veðri að hafa til forystu hraðgengan hest og heimfúsan, sem óhætt er að treysta.

Rauður var aldrei notaður til reiðar sökum þess, hve illgengur hann var á brokki.

Þegar móðir míni árið 1905 hóf íbúðarhússbygginguna var allur trjáviður fluttur á hestum frá svonefndum Skiphól, sunnan Hvammsfjarðar og þangað var hann fluttur á sjó utan frá Stykkishólmi. Þar var hann keyptur hjá verslun Sæmundar Halldórssonar, en þess getur Óskar Clausen í endurminningum sínum. – Viðurinn var bundinn í drögur og venjulega fluttur á 12 hestum, stundum fleiri, ef lánshestar voru með. Þrír eða fjórir menn voru til að útbúa klyfjarnar og fylgja lestinni, var uppábúnaði hestanna flýtt eftir því sem kostur var, því alltaf varð að sæta sjávarföllum fyrir Snóksdalspolla og kostað kapps um að komast á sömu fjöru fram og til baka, því að öðrum kosti var um miklu lengri leið að fara, ellegar bíða yfir flóðið. Engum hesti var sleppt lausum fyrr en klyfjar voru komnar til klakks á þeim öllum, og venjulega var Rauður með þeim síðustu, sem látið var upp á. Þar sem gatan inn yfir Vestliðaeyrina var rúm og mjög greið, leið ekki á löngu áður en hann var orðinn fremstur og leiddi eftir það lestina alla leið heim. Bærinn Gröf er sem næst þrem km neðar í Sökkólfssdal en Breiðabólsstaður, og tók fólkid í Gröf eftir því, að þegar Rauður stikaði þar framhjá, mátti búast við aðallestinni að hálftíma liðnum. Aldrei minnist ég þess að ofan færð drögur af Rauð, þó hann væri svo langt á undan og enginn til að líta eftir. Honum virtist falla mikið betur að draga en bera allan þungan á baki sér. – Rauður var einn þeirra hesta, er ég fékk

úr búi móður minnar þegar hún hætti búskap. Ég þekkti hann því vel og vildi ekki missa hann sem forystuhest í flutningaferðum heimilisins.“

Í eftirfarandi kafla ræðir Jón Sumarliðason um hið svonefnda *Skógrkotskyn* og tæplega er þess fróðleiks að vænta frá nokkrum nýlifandi manni.

„Ólafur í Skógrkoti í Miðdöllum, föðurbróðir minn, átti jarpsokkótta hryssu, er *Skotta* var kölluð. Hún var fjörhross mikið, klárgeng en brokkið fínt. Frá þessari hryssu er komið hið svonefnda Skógrkotskyn. Kristján Jóhannesson, sem lengi var heimilismaður í Skógrkoti eignaðist bleikskjóttu hryssu undan Skottu. Var hún í flestu lík móður sinni. bæði með vilja og gang. – Pessar tvær hryssur urðu formæður margra gæðinga í Döllum og víðar. Skal hér nokkurra getið.

*Höttur*, brúnhöttóttur brokkhestur með æstan, tillitslítinn vilja.

*Brúnska*, með henni kom skeiðið í ættina og ekki spillti það kostum hennar né útbreiðslumöguleikum.

*Jarpskjóni*, reiðhestur Finnboga bónda á Sauðafelli var af Skógrkotskyni, bráðviljugur hestur og flugvakur.

*Kolbakur* Jóns Jónssonar í Hundadal var alþekktur gæðingur og mikið af honum látið. – Báðir síðasttaldir hestar lento síðast í eigu Þórarins Egilssonar í Hafnarfirði, en hann var á sinni tíð mikill hestamaður.

*Bursti*, ljúflingshestur með ágætan vilja og mikið gangrými. Eftir því sem ég best man keypti Baldvin bróðir minn hann af Kristjáni í Skógrkoti, þá óvanaðan. Var hann svo um skeið hafður til kynbóta, en síðan seldur Guðmundi P. Ásmundssyni á Krossi í Haukadali, sem aldrei létt klárinn falan, hvað sem í boði var og felldi hann að síðustu heima.

Margir fleiri hestar af Skógrkotskyni hafa látið að sér kveða í Miðdöllum.

*Sokki* Ólafs Finnbogasonar á Sauðafelli, jarpsokkóttur, mikill fjörhestur með brokk og tölt.

*Kuldi* Gríms Jónssonar í Hundadal, brúnn gæðingur með góðan vilja og allan gang.

*Brúnn* Benedikts Sveinssonar á Hamraendum var mikill gæðingshestur og viljugur, jafnfær á öllum gangi, taumléttur og lundþýður.

Kristján í Skógrkoti hélt mikið upp á þessa hrossaætt og lagði rækt við hana fram á elliár, enda brást hún aldrei hvað snerti vilja og ganggæði.

Hestaunnendur í öðrum héruðum litu margir hýru auga til ungra hrossa, sem upp ólust í Döldum og áttu ætt sína þangað að rekja. Þaðan eru því komnir margir landskunnir gæðingar.

*Gletta* Sigurðar Ólafssonar var frá Dönustöðum í Laxárdal. Hún var landsfrægt skeiðhross og mun enginn hestur enn þá hafa hnekkt meti hennar á skeiðspretti. (Vantar árið, sem þetta er ritað. Innskot E.K.) Undan Glettu hefur Sigurður eignast mikla og ganglægna hlaupahesta, sem unnið hafa til verðlauna á nálega hverju hestamóti.

*Gnýfari* Porgeirs í Gufunesi er líka úr Döldum. Hann er ættaður frá Kirkjuskógi í Miðdöldum og var einn fljótasti stökkhestur landsins um margra ára skeið.

Í Bæ og í Skörðum voru mörg fótlipur viljahross, en ekki er mér kunnugt, hvort þau áttu ætt að rekja til mæðgnanna í Skógrkoti, Skottu og Bleikskjónu.“ Hér lýkur frásögn Jóns Sumarliðasonar.

## SETIÐ HJÁ SAUÐAFELLSBRAEÐRUM OG ÓSKARI BJARTMARZ

Óskar Bjartmarz, fyrrum forstjóri Löggildingarstofu voga- og mælitækja býr nú á heimili aldraðra í Seljahlíð í Reykjavík. Hann verður 97 ára á þessu ári, 1988, en ber þennan háa aldur mjög vel. Kona hans var Guðrún, dóttir Bjarnar sýslumanns Bjarnarsonar á Sauðafelli. – Árum saman ferðaðist hann umhverfis landið á hestum, en það tilheyroi starfi hans. Óskar ólst upp í Döldum og getur enn þá

rifjað sitthvað upp um menn og málefni – beggja megin síðustu aldamóta. Hann segir nú frá.

„Ég man vel eftir vígslu brúarinnar yfir Norðurá í Borgarfirði.“ (Í júnimánuði 1911, sbr. „Öldin okkar“ það ár).

Við Dalamenn fjölmenntum mjög, já, það fór fólk í stórhópum suður um Bröttubrekku og þar voru margir glæsilegir gæðingar í för.

Það var vitað, að auk ræðuhalda, myndi verða glímu-keppni og kappreiðar. Ég mun hafa verið í hópi Miðdælinga, en þeir áttu á þessum árum marga snjalla góðhesta. – Finnbogi á Sauðafelli var mættur með hestinn Hrapp. Við upphaf kappreiðanna komu Borgfirðingar að máli við Finnboga og báðu hann að vera með í skeiðkeppninni. Finnbogi létt lítið yfir sér (var þó dálítið hýr af víni) og sagðist ekki vita hvort hann ætti nokkurt erindi með Hrapp í þann gæðingahóp, sem á staðnum væri. Það þarf vart að taka það fram, að þarna voru mættir allir helstu sveitarhöfðingjar Borgarfjarðarsýslu og margir þeirra með úrvalshesta. Jú, Finnbogi kvað best að lofa Hrapp að hlaupa með í skeiðkeppninni. **Hófst nú keppnin.** Finnbogi og tveir aðrir reyndu saman. Fyrst tók borgfískur hestur forystuna, en Finnbogi og annar Borgfirðingur spöl á eftir. Allt í einu geysist Finnbogi á Hrapp framúr báðum keppinautunum. Þegar vel er hálfnáður völlurinn, gerðist nokkuð, sem ég hefi aldrei síðar orðið vitni að á kappreiðum – við horfðum á það að Finnbogi sneri sér við til hálfs í hnakknum, til að sjá til þeirra, sem á eftir voru, en hestur hans hélt þrátt fyrir þetta fullri ferð og truflaðist ekki hið minnsta á skeiðinu. Hann var langfyrstur að marki, enda var hann afburða skeiðhestur. – Eitthvað komu þessi úrslit Borgfirðingum á óvart, þeim þótti víst verr en miður.

Kappreiðarnar við Norðurá voru lengi í minnum hafðar, ekki síst þau feikna tilþrif, sem Hrappur sýndi þarna á skeiðspretti sínum. – Parna var sagt að hefðu verið um 1500 manns þegar flest var og urðu því mörg vitni að þessum og öðrum úrslitum á samkomu þessari. – En svo undarlega



Yngvi Finnbogason frá Sauðafelli, einn af stofnfélögum Glaðs.



Ólafur Finnbogason frá Sauðafelli, einn af stofnfélögum Glaðs.

bregður við, að í fréttaströgnum frá þessu móti er úrslitanna í skeiðkeppninni að engu getið. Hins vegar er getið úrslitanna í stökki, en þar vann til fyrstu verðlauna rauðskjóttur hestur í eigu Davíðs Þorsteinssonar á Arnbjargarlæk. – Engum getum skal hér leitt að því, hverjir stóðu að fréttaströgnum af þessari samkomu, hvort það voru Borgfirðingar eða aðrir aðilar, en skemmtilegra hefði verið að hafa úrslit skeiðkeppninnar með, ekki síst fyrir þá sök að líkindi eru til að þarna hafi Dalamaður í fyrsta sinni hlutið fyrstu verðlaun í skeiðkeppni. Pó skal ekkert fullyrt um slíkt. Dalamenn voru harla glaðir, þeir ráku einhvernveginm ósjálfrátt upp heróp, já, þeir máttu það. – Mig minnir að verðlaunin væru 15 krónur, sem Finnbogi tók á móti.“

Hér lýkur frásögn hins aldna höfðingja, Óskars Bjartmarz. Hann hafði eins og rést í baki og glampa sló á augu meðan á frásögn þessari stóð.



Guðlaugur Magnússon frá Kolsstöðum, stofnfélagi Glaðs.



Finnbogi Finnsson, Sauðafelli situr á *Hrapp* sínum. Myndin tekin um 1911.


Ljósmyndari óþekktur.

Þeir Sauðafellsbræður, Yngvi og Ólafur Finnbogasynir sögðu með sama hætti frá kappreiðunum við Norðurá eins og Óskar Bjartmarz. Finnbogi á Sauðafelli, faðir þeirra bræðra, (f. 1867, d. 1953) var um hálfraðr aldar skeið einn traustasti bóndi í Miðdolum, síðast á Sauðafelli, árin 1918 – 1936.

Þeir Sauðafellsfeðgar áttu hvern gæðinginn eftir annan, höfðu oft þetta 7 – 8 hesta á húsi að vetrinum og tömdu yfirleitt allt sjálfir. Er vafasamt að á nokkrum öðrum bæ í Döllum hafi verið betra val góðhesta á tímabili. – Oft var líka gripið til hesta þar ef fylgd eða flutning vantaði yfir Bröttubrekku, eða sækja þurfti lækni.

Yngvi Finnbogason sagði svo frá fóðri hestanna, að bestu hestarnir hefðu fengið mjólk eða áfir með fingerðu heyi, stundum töðu. Taldi hann mjólk fara afar vel í hesta.

Skeiðhesturinn Hrappur var fæddur úti í Hrapsey. Fékk



Albert Finnbogason frá Sauðafelli situr á Gránu, sbr. frásögn. Ljósm. Jón Guðmundsson, Ljárskóum.

Finnbogi hann 6 vетra gamlan frá manni er Magnús hét Gíslason. Magnús var í Stykkishólmi eða á Skógarströnd og var oft í ferðum á Ströndinni og talinn ölkær nokkuð.

Sagt er að einu sinni hafi Hrappur synt með Magnús hangandi í faxi sínu yfir Álftafjörð. Mátti þá litlu muna að illa færi.

Hrappur var tæplega meðalhestur að stærð, 51 – 52 tommur. Var hann illa til reika þegar hann kom í hendur Finnboga, sem þá bjó á Svínholi. Gera verður ráð fyrir að fljótt hafi hann séð út folann. Pegar komið var með folann að Svínholi var honum sleppt á húsatúnið. Segir það nokkuð út af fyrir sig.

Þeir bræður Yngvi og Ólafur ræddu nokkuð um samanburð á góðum hestum, fyrr og nú. Þeir sögðu m.a.: Áður fyrr áttu menn hesta af nauðsyn. Þeir voru í stöðugri þjálfun



Póra Borg, leikkona dvaldi á sínum yngri árum mörg sumur á Sauðafelli. Hún tók ástfóstri við hryssu þessa og átti margar yndisstundir á hestbaki.  
Myndin tekin á Sauðafelli.



Óskar Bjartmarz, fyrrv. forstöðumaður löggildingarstofu voga og mælitækja.

og áreynslu. Menn urðu að geta treyst á góða ferðahesta, úthald þeirra og þrek. Þess vegna náðu góðir tamningamenn að jafnaði því besta fram, er í hverjum hesti bjó.

Ólafur Finnbogason sagði að Finnbogi faðir sinn hefði selt sinn besta hest, Sauðafells-Skjóna. Kaúpandi hans var Pórarinn Egilsson í Hafnarfirði, eins og áður hefur verið vikið að. Verð hestsins var 1100 krónur, en þá lagði dilkurinn sig á 8 – 9 krónur. Skjóni var jarpskjóttur hestur með allan gang. Mun Ásgeir Jónsson í Gottorp hafa látið svo ummælt, að af þeim tveimur kunnu gæðingum – Kolbak frá Hundadal, er hann mun hafa séð hjá Stefáni skáldi frá Hvítadal, sem átti hann um skeið – og Sauðafells-Skjóna, er hann hafði heyrt lýsingu af og sögur, þá hefði hann talið hann enn snjallari gæðing en Kolbak. – Enda var Sauðafells-Skjóni mjög umtalaður góðhestur á sínum tíma.

selja hana til Þýskalands. Víglundur frá Kirkjuskógi kaupir hana þá og kemur henni vestur til átthaganna aftur.

Hann kvað föður sinn hafa selt annan gæðing brúnan til Thors Jensen. Líkaði Thor hann ekki verr en það, að nokkru eftir kaupin og hesturinn var farinn suður, þá sendi hann húsfreyjunni á Sauðafelli. Margréti Pálmadóttur brjóstnælu úr gulli. Átti nælan að vera uppbót á kaupin.

Þeir bræður, Yngvi og Ólafur töldu eins og fleiri hafa haft á orði, að Ólafur Jóhannesson í Stóra-Skógi (f. 1857, d. 1931) hefði átt úrvalshesta, sérstaklega skeiðhesta. Einna kunnastir voru tveir rauðir, og var annar þeirra kallaður Eiríkur rauði. Sagði faðir þeirra bræðra frá því, að eitt sinn þegar Hvammsfjörður var ísilagður út undir eyjar, hefði Ólafur í Skógi ásamt fleirum verið á heimleið eftir ísilögðum firðinum.

Parna var Ólafur á Eiríki rauða, sínum mikla skeiðhesti. Menn mældu vegalengdina milli spora, hefur hún nú gleymst en var með ólíkindum mikil. Skeiðvöllurinn var í stærra lagi, eða nokkrir kílómetrar.

Bróðir þeirra bræðra, Albert, bóndi um skeið á Erpsstöðum átti gráa hryssu, afburða brokkara með flughraða. Einu sinni þegar Björn H. Jónsson var skólastjóri í Hjarðarholti (1920 – 1924) var haldin samkomu í Hjarðarholti, og voru meðal annarra skemmtiatriða haldnar kappreiðar. Fóru þær fram á túninu, nálægt fjárhúsunum, er þá stóðu. Þar sigræði Grána Alberts Finnbogasonar með yfirburðum. Eyjólfur í Sólheimum hafði verið þarna og lét hann svo um mælt að Grána hefði haft tíma til að hlaupa hringinn í kringum fjárhúsin á sprettinum. Grána var ofsafjörhross og fárra meðfæri.

Þeir Sauðafellsbræður töku oft þátt í kappreiðum eins og kappreiðaannáll Glaðs ber með sér. Þeir sögðu líka frá því, að menn hefðu komið saman á gæðingum sínum, sumar og veturn, ef sléttur grasvöllur eða melur fannst. Og skal þá ekki gleymt ísilögðum vötnum og ám, er löngum hafa verið vettvangur góðra skeiðhesta. Þeir sögðu að vegalengdir hefðu

ekki verið mældar í metrum og þaðan af síður voru menn með skeiðklukkur í höndum. Útreiðartúrar á fagra staði í frjálsri náttúru voru helstu samfundir ungs fóks á fyrri árum, eins og verið hafði síðan á söguöld.

Svo komu jepparnir og aðrar bifreiðar á fjórða og fimmta áratugnum, og hestarnir þokuðustu smátt og smátt til hliðar í two til þrjá áratugi að þeir urðu aftur augnayndi en notkun minni og með öðrum hætti en áður.

Báðir bræðurnir, Ólafur og Yngvi gerðust stofnfélagar Glaðs og eru nú ásamt Guðlaugi Magnússyni frá Kolsstöðum einir á lífi af frumherjum félagsins.

## ÆTTMÓÐIRIN Í KIRKJUSKÓGI

Ágúst Sigurjónsson fyrrv. bóndi á Erpsstöðum segir frá

Sigurjón Jónsson, bóndi í Kirkjuskógi, (f. 1875, d. 1956) átti um skeið hryssu, er fædd var árið 1934 og hlaut nafnið Ör. Hún var fífilbleik að lit og undan hryssu frá Oddsstöðum en faðirinn var af Hindisvíkurkynni.

Ör var geysihróð á brokki og var oft reynd á kappreiðum, á Nesodda og á Faxaborg. – Peir bræður, Ágúst og Víglundur Sigurjónssynir frá Kirkjuskógi lýstu nokkuð ferli þessarar hryssu og afkomendum hennar en hún varð ættmóðir nokkurra góðhesta.

Einna minnistæðust hefur orðið frammiðstaða hennar á Faxaborg sumarið 1943. Þá sigraði Ör á 300 metra stökki á 22 sek. Nokkru áður það sama sumar var hún reynd í stökkkeppni á Nesodda. Þá vildi svo til að hún stóð nokkur augnablik þegar rásmerki var gefið. Urðu keppinautar hennar vel á undan fyrst í stað en hún náði þó þeim er fremstur fór, en það var Stígandi Ólafs Pórarinssonar en honum var þó dæmdur sigurinn. Þessi tilprif hryssunnar á Nesodda og Faxaborg urðu til þess að vekja athygli á henni, sem endaði með því, að þrír menn úr Reykjavík mynduðu hlutafélag um kaup á henni og greiddu fyrir hana 3 þúsund krónur árið



Víglundur Sigurjónsson situr á Gnýfara yngri, f. 1976. Hann ber sterkan svip formóður sinnar, Örvar frá Kirkjuskógi.



Víglundur Sigurjónsson situr *Ör* frá Kirkjuskógi. Valdimar Jónsson frá Kringlu tók myndina um 1940.

1944. Nefndu þeir félag sitt Sprett hf. Hryssan var svo í Reykjavík næstu árin, allt til 1951, en þá stóð til að selja hana til Pýskalands. Víglundur frá Kirkjuskógi keypti hana þá og kemur henni vestur til átthaganna aftur.

Ör átti alls 5 folöld. Fyrsta folald hennar fórst af slysförum inn á Geldingadal. Annað folaldið, sem hún eignaðist var Gnýfari, hinn landskunni hlaupagammur Porgeirs í Gufunesi. Eftir að hún kom vestur átti hún brúnan hest, sem Glaður hafði sem kynbótahest um tíma. Svo eignaðist hún rauðstjörnóttá hryssu, Stjörnu, f. '54, sem nokkrir góðir hestar hafa komið undan. Stjarna var klárhross með tölti. Eigandi hennar var Águst frá Kirkjuskógi. – Undan Stjörnu komu tvö góðhross, Brana, f. '58, grá hryssa, hlaupahross, og Funí, f. '59, klárhestur með tölti bæði hrossin í eigu Guðmundar sál. Ágústssonar á Erpsstöðum. Sonur Brönu var Hrímnir, klárhestur með tölti. Eigandi var Guðmundur á Erpsstöðum.

Megineinkenni margra þessara hrossa var hlaupahraði og gott keppnisskap.

Nokkrir bestu afkomendur Órvar voru að loknum sínum ferli heygðir að fornum sið og hefur það á seinni árum verið gert víðar í Dölu.

### LITFÖRÓTTU HROSSIN Á PORBERGSSTÖÐUM

Á Porbergsstöðum í Laxárdal mun um alllangt skeið hafa verið litförótt hestakyn, sem mikið orð fór af um tíma. – Frásagnir eru nokkuð á reiki um uppruna þessa stofns hér í Dölu. Elsta frásögnin er á þá leið að þegar Ólafur Indriðason, Gíslasonar á Hvöli (f. 1862, d. 1946) var ungar maður í Saurbæ, hafi hann beðið Jón Ásgeirsson á Pingeyrum að útvega sér gott reiðhross að norðan. Sagan segir, að Jón hafi sent honum brúna hryssu, ættaða úr Pingi. Átti hryssa þessi að hafa verið listagott fjörhross með allan gang. Hún átti svo að hafa átt litföróttan fola, er þetta litförótt kyn á Porbergsstöðum væri komið út af. Sé þessi frásögð rétt, þá hefur þetta skeið í búskapartíð Kristjáns Tómasonar, hreppstjóra á Porbergsstöðum, en hann bjó þar árin 1869 til æviloka 1907. Benidikt, sonur Kristjáns tók þá við búi á Porbergsstöðum. Meðal afkomenda hans er talið fullvist að hann hafi keypt tvær litföróttar hryssur norðan úr V.-Húnnavatnssýslu og þær séu formæður litföróttu kynsins. – Má raunar vera að báðar þessar frásagnir eigi við full rök að styðjast þótt hér verði ekki dæmt um það.

Einn af sonum Benidikts Kristjánssonar á Porbergsstöðum, Ágúst, mun hafa lagt sérstaka rækt við kyn þetta, enda komu nokkur rómuð góðhross þaðan. Sérstakt einkenni margra þeirra var afbrigða mikið fjör. Ágúst á Porbergsstöðum lést árið 1936 og eftir það virðist sem ræktun kynsins hafi hnignað, en nokkur hross blönduð þessu kyni og með litareinkennin finnast enn þá í sýslunni.

Andrés Magnússon, bifreiðastjóri frá Ásgarði var kunnur hestamaður. Hann átti um skeið litföróttan reiðhest af þessu



Hér situr Jón Ingvarsson frá Hóli í Hvammssveit á hesti sínum, Létti. Léttir var litföróttur góðhestur. Hafði allan gang og var kominn af litförótta kyninu frá Þorbergsstöðum.

kyni. – Sigurgeir Magnússon, höfundur bókarinnar *Ég berst á fáki fráum* segir í eftirfarandi bókarkafla frá kynnum sínum af Litfara Andrésar, þegar þeir höfðu hist í Saurbænum og orðið samferða suður Svíndalinn bjarta júlinótt árið 1933:

„Litfari stóð kyrr á meðan ég fór á bak, en auðfundið var, að hver vöðvi var þaninn. Strax í fyrstu sporum tók hann nokkur bogahopp til að búa sig undir að ná stökkinu, hlutverk mitt var að lægja öldurnar, sem risu hátt. Hér gilti allt annað lögmál en hjá venjulegum hesti. Svona óður fjörhestur þolir ekki föst átök, heldur er léttleikandimátulegur stuðningur við taumana vísast til árangurs. Pað var sama, hvort farið var eftir grundum eða melgötum, yfir ár eða læki, aldrei slaknaði á spennu. Hafi nokkur maður og hestur átt nokkurn sérstakan stað á landi hér út af fyrir sig, þá áttum við Litfari Svíndalinn þessa nótt, með öllum hans gögnum og gæðum. Stundum hvarf allt úr vitund minni, dalurinn,

samferðafólkið, hinir hestarnir, tími og rúm. Hugur minn dvaldi eingöngu við hreyfingar þessa dásamlega hests. Við-brögð míni voru að fylgja eftir snöggum hreyfingum hestsins og ótrúlegum fyrirbærum hans á öllum gangtegundum. Prátt fyrir þetta laut hesturinn vilja mínum, að svo miklu leyti, sem fjörhestar gera. Allt skiptist á, brokk, tölt, skeið, stökk og hopp – hver gangtegund stutt í einu.” Lýkur hér frásögn Sigurgeirs.

Andrés í Ásgarði var laginn hestamaður og mun hann hafa tamið þennan litföróttu gæðing. Annan hest af sama kyni eignaðist Andrés eftir að hafa selt þann fyrri. Kom Andrés honum í tamningu til Guðmundar Theóðórs, bónda í Stórholti. Guðmundur var þekktur að góðri hestamennsku og mun hafa verið laginn tamningamaður. Þessi hestur var líka rauðlitföróttur og batt Andrés miklar vonir við hann. Kom folinn að Stórholti um haust en veiktist um miðjan veturnar svo varð að fella hann.

Eins og áður segir finnast enn þá litförótt hross, sem eiga ættir að rekja til þessa kyns á Þorbergsstöðum. Það er aldrei að vita nema enn eigi eftir að koma fram á sjónvarsviðið litföróttir fjörgammar, sem bera í sér neistann forna úr Húnabpingi.

## KAPPREIÐAR Á FYRRI ÁRUM

Guðmundur á Hóli í Hörðudal er einn af heiðursfélögum Glaðs. Hann segir svo frá að þegar hann var 9 ára gamall hafi hann fengið að fara út í Gunnlaugsvík á skemmtisamkomu, sem þar var haldin að sumarlagi. – Samkoma þessi var allvel sótt og var dansað um kvöldið í vörugeymsluhúsi á staðnum. Fyrr um daginn höfðu farið fram kappreiðar uppi á melunum fyrir ofan víkina. Voru hestar reyndir á

stökki. Fljótastur varð brúnn hestur, er Fauti hét, kynjaður frá Hlíð í Hörðudal. Var hann setinn af eiganda, Gísla Jónsyni, er þá dvaldi sem lausamaður í dalnum. Næstfljótasta hestinn, gráskjóttan að lit, átti Sigfús Einarsson í Blönduhlíð. Priðja hrossið, er reynt var þarna var Grána Alberts Finnbogasonar frá Sauðafelli, var hún afbrigðafljót, en náði ekki að sigra í þetta skipti.

Að sögn Ólafs Finnbogasonar frá Sauðafelli voru einnig þetta sama sumar haldnar kappreiðar á Nesodda, en ekki eru nánari fréttir af úrslitum þeirra.

Samkvæmt þessum frásögnum hafa farið fram kappreiðar á tveimur stöðum í sýslunni sumarið 1924, þ.e. eins og áður segir á Gunnlaugsvíkurmelum og á Nesodda.

Árið 1925 var haldin skemmtisamkoma á Dönustöðum í Laxárdal. Háður var kappsláttur, hlaup og kappreiðar. Þrír Laxdælingar reyndu þar hross sín. Þeir voru Daníel Jónasson frá Sólheimum, Skúli Jóhannesson á Dönustöðum og Böðvar Eyjólfsson frá Sámsstöðum. Kappreiðarnar fóru fram á svonefndum Skeiðmel innan við Dönustaðatún. Böðvar bar sigur úr býtum á jarpri hryssu frá Sigurði Sigurðssyni á Hvítadal. (Heimildarmaður Böðvar Eyjólfsson).